

四庫全書

集部

欽定四庫全書

集部

苑洛集卷二十九

詳校官庶吉士_臣李如筠

中書_臣劉源溥覆勘

總校官原任中允_臣王燕緒

校對官中書_臣溫汝适

謄錄監生_臣李逢堯

欽定四庫全書

苑洛集卷十九

明 韓邦奇 撰

見聞考隨錄

當今所最急者宗室祿米不足也邊軍糧料不足也以
宗室言之國初宗室少即今宗室多蓋有百倍於昔者
而糧額如故謂之曰少誠無所處矣以邊軍言之國初
軍馬多即今軍馬少不過十之六七國初糧料於正額

外猶有餘數即今正額之外無所減若之何而不足也弘治以前倉廩露積未聞告乏今乃往往告饑若謂水旱災傷及小民之逋欠國初以來豈無水旱災傷及逋欠者乎況邊稅又不在捐免之例是必有其故矣

各處巡撫初以侍郎為之其權甚重某侍郎初至坊方考察二司官提學官亦在論劾中眾曰提學官無大過巡撫曰既無大過吏負之責五板姑留供職

官不久任雖欲言治皆苟而已百弊皆生於不久任百利

皆生於久任非可以言說盡也不必上考古制我高皇之法
三年一考六年二考九年三考然後考功司付文選司因其
考語之高下或平除或陞一級或陞二級間有緊急用人功
業顯著六年以後亦得超陞若不再考而陞者考功必詰之
文選何所憑據而知其賢乎弘治以前皆遵行之舊事按
察司官惟按察使陞布政副僉鮮有陞布政司者惟風力
不著之人間以陞之副使李隆陞叅政見邸報泣曰我何
負於其職而陞此官乎遂致仕去布政司官亦鮮陞按察

司者至正德中止因躁進無耻之士干求權幸而圖速化吏部以其年資尚淺無可奈何或以僉事陞叅議或以叅議陞副使而祖宗之成法壞矣嘉靖初凡正德中弊政小大皆釐正之此係政之最大者不循其舊是祖宗百年之成法顧不能守而正德中一時之弊乃守之而不失以耳目之所見聞者朝邑知縣劉道立成化十八年以進士除授中間兩次考滿并緣事之日至弘治五年十年餘方行取為御史繼道立者蘇槃弘治五年以舉人除授至弘

治十五年一十年餘考滿去槃又循良吏也當是時上下相安盜賊不生地方無擾果園菜圃不設牆垣不設防守倉庫充盈閭閻殷殖猶可想見其氣象也自弘治十五年至今四十餘年知縣十五餘人即今環數百邑庫無百金之積村落之中在在室如懸磬催科之人晝夜號呌雞犬亦不得寧也

陝西防邊之法考唐三城守之於河外上策也蓋守之於河外則險在我而易為力守之於河南則險在虜而

難為功也修夾道之墻時出精兵以搜套中策也其下策來則浪戰去則坐守而已

蘇秦亦識天下之勢不幸而不遇急於富貴而為合從非其本見也初學既成知周室易興說周顯王顯王不能用次知天下惟秦強可輔之霸而說秦惠王惠王不能用然後說六國使合從非其本心也卒之殺身使顯王用之則周之威令可復振秦惠用之則秦可霸而身可全

人才可惜造就之難黜汚之易易之鼎以金鉉玉鉉象之金鉉玉鉉人所寶愛而珍護之人能愛才如愛鉉其愛國之忠深矣古人九載黜陟幽明今制三年考察其法已密在外撫按事竣復有旌劾是又不時考察矣其所劾固有貪殘之輩中間或小過或詿誣或譖謗或語言不合趨承未至以致黜退我國家以科目取士中其選者皆俊乂之器才識不大相遠但習與不習耳習之於累年棄之於一旦以壯年有用之才終身閒廢深可

惜也夫旌異之典以待茂才異等論劾者以處元兇巨惡不可待考察之期者今所劾者果不可待考察之期乎聖人制刑多加寬恤惟鼎文覆公餗其刑劓以其蔽九二之賢也劓族刑也不少假借聖人之意深矣

天下之安危在斯民斯民之利病在縣令最要官也當今之縣令與前代不同漢唐宋之縣令一體視之惟以賢否為高下今則分為二途進士除者雖橫行逆施上之人必曲為回護舉貢除者一有過失即斥去至於接

見稱謂之間亦大不同進士官但能舉職即得大典舉
貢官雖竭盡心力亦不能得間有得之者亦是通變趨
時之士豈惟上人雖下民視之必有輕重進士官自少
至老官至公卿舉貢官鮮有十年者至方面官者絕少
自非有志之士獨立不懼自知日暮途遠必為私家之
計矣此雖非祖宗立法之意其勢堅不可破決不能一
即使二途並用年歲亦不可齊進士中式年未二十即
授官舉人雖二十中式坐監歷事聽選三十以後方得

選官歲貢雖二十補廩五十方得貢出六十以上方得
選官前程能有幾何不有以變通之如天下斯民何莫
若多取進士每科千名鄉試量其地方加之或三之一
或四之一或五之一庶乎無偏無黨而治可成矣

正德三年六月中早朝拜伏既起御階上有無名揭帖
一本皆言劉瑾事上命錦衣衛查既而瑾傳旨令百官
至奉天門下跪候發落辰刻命堂上官起出巳刻瑾出
立門東翰林院官就東跪訴內監待翰林院官素厚豈

肯如此瑾令起出御史甯杲訴於瑾曰御史等官素知
法度豈敢如此此乃新進士所為瑾曰新進士與他有
何相干你每把朝廷事件件壞了略加處置就都怨恨
太祖法度你每不曾見豈不聞知瑾令百官皆起照舊
站立看有揭帖處是何官太監黃公偉曰凡朝四品以
上各照班次五品以下皆雜立丟帖之人豈肯復立於
此虧了人瑾令復跪又點武士令各官家搜稿黃公曰
他幹此事雖妻子亦不得知豈肯留稿瑾已之此事若

非黃公不惟擾害不知搜出何等無端事件為禍不淺
時天暑日烈通無寸雲微風僵者數人命拽出黃公忿
曰你帖子說的都是為國為民事挺身出來死了也是
好男子枉累別人瑾怒曰在外匿名帖子尚該死罪御
前如此是何為國為民好男子如何不明白具奏皆入
留太監李公榮監之李曰你們倒一倒衆內使擲下冰
瓜甚多李曰你們取食之瑾出李曰你們都跪著來了
來了瑾見甚怒復入既而傳出李公私宅閑住黃公南

京閑住申刻旨出都拏送錦衣衛追究進士盧伸昏迷
擡至錦衣衛監中不能容丟放院內是夜不知何時身
死都人淘淘皆罷市初各官拏送錦衣時途中賣飯者
皆爭以飯遞送各官不索價明日瑾微聞帖子乃內人
所為命軍官丟下乃命各堂上將各官領出辦事

成化中萬妃寵冠後宮弟萬二權傾中外京師呼為萬
舅門達素貧不能自立萬二微時通達妻官至錦衣衛
指揮學士萬安附為同族入內閣權寵異尋常吏李自

省僧計曉皆以藥術自省官至禮部侍郎曉稱為法王
佛子皆謁見無時曉以黃絨繚絡左手於項揖公卿內
臣止以右手曰左手有所用也萬妃酷愛寶石京師富
家多進寶石得寵幸賞賜累巨萬內帑幾為之空京師
呼曰某寶石家某寶石家畏之也孝皇初自省等皆得
罪寶石則追其原價入官各家破產不能償

正德中每免朝後司禮監諸璫至左順門西面立各衙
門說事如御門禮如吏部引復堂官北面跪說畢司禮

監首璫云聖旨著復職鴻臚寺官贊云叩頭起揖諸璫
答揖如都察院引巡按說畢首璫云聖旨著東邊的去
禮如引復尚書楊公一清當謝恩至掖門顧隨行主事
曰既叩頭便是朝廷之上不可揖司禮監不當答揖既
相揖便不可叩頭須如何處主事曰叩頭禮不可不行
不揖可也公曰正然

都督韓公觀提督兩廣初入境生員來迎觀素不識生
員見其中衫異常人命刀手縛斬之左右曰此生員也

觀曰生員亦賊耳盡斬之朝廷聞之喜曰韓觀善應變
使其聞生員而止則軍令出而不行矣豈不損威

提督韓公觀殺人甚多御史欲劾之一日觀召御史飲
以人皮為坐褥耳目口鼻顯然髮散垂褥首披椅後殺
上中一人首觀以筋取二目食之曰他禽獸目皆不可
食惟人目甚美觀前席坐每擊人至觀命斬之不回首
視已而血流滿庭觀曰此輩與禽獸無異斬之如殺虎
豹耳御史竟不能劾

都御史韓公雍才高有智略提督兩廣令布按二司官
皆行跪禮提學某曰提學官與軍門無干請勿跪公曰
提學既不行跪禮明日另見明早取應死罪人置之廂
房命劊手曰待我言殺了汝等大聲應之及提學來見
既至堂甫揖下公大聲曰拏下殺了衆應之如雷提學
以為殺已也不覺跪下二司官笑之曰不如昨日同跪
無形迹也此可以警悖悖無實守者

又公巡撫江西每對生員稱說詩書時江西科目方盛

生員私相謂曰巡撫千字文秀才耳安得稱說詩書公聞之命提學送諸生來考以律呂調陽為論以閏餘成歲為策諸生皆不能詳公曰我們做秀才時讀了百家姓便讀千字文諸生如何連千字文也不知聞者絕倒此可以警浮薄之習

于忠愍石國公各集紀載者皆實錄但文之抑揚殊有未當二公皆有功於社稷非忠愍則天下之治亂未可必而分為南北則必然矣非國公之宣威敵未必遽退

也其罪則皆有可言者當英廟北狩李實楊善出使奉
迎不持一御衣不持一珠玉其意何如也此衆情之所
深憤英廟之所痛恨者遣使敵庭正兵部事忠愍委之
不知可乎回鑾之日入于南城此理義之至公無可言
者憲廟已立太子而廢之此國家之大事忠愍雖為兵
部簞墪謂其以大司馬兼行六卿之事隱然拜相之制
當時何無一言及之乎當景皇帝病篤之時已出駕帖
取楚世子繼統王長史勸世子無行而止取藩王入嗣

極大之事豈有內閣兵部不與聞乎而雙溪乃謂景皇帝賓天之後廷臣必推戴英廟何謂也復辟之事當與天下共豈國公所當專為者哉忠愍之得罪得罪於英廟國公之有功有功於英廟至於廢儲取世子一節則其得罪非特英廟而已大司寇彭公作名臣錄人以不錄忠愍問彭公曰功之首也蓋謂罪之魁此至當之論而國公之罪則恃寵驕縱知進而不知退知存而不知亡耳今忠愍祠于杭州嘉靖初南都言官謂當復國公

之爵而祠之顧未施行此論于石者之所當識也

雪川頻洲云當今相業當以端毅王公為首稱或問李西涯如何曰文學亦可觀相業則槩乎未之聞也

御史張公芹奏牘云李榮陳寬劉瑾張永魏彬數人性行不同而東陽皆得其懽心其結納神奸誠不可測矣五泉子李西涯琢碑行云平生一字值千金忍使全篇俱椎鑿

雙溪雜記云正德初韓忠定率九卿伏闕請劉瑾等八

人下獄內則太監王公岳外則大學士劉公健合謀已
得旨但是日天晚候明早即宣旨送出瑾等而瑾等不
知也大學士李公東陽泄其謀於瑾瑾等始大驚時上
御豹房二鼓環泣叩頭於上側且云待明日臣等不得
見爺爺矣是夜以瑾為司禮監傳旨云已發落矣遂成
正德中之禍

孝皇十八年不輕下詔獄錦衣乙丑主事李夢陽劾張鶴
齡疏有云陛下待張氏者厚矣上震怒下夢陽錦衣獄

中外洶洶莫敢言越數日上召大學士劉公健議事畢
健從容請曰李夢陽不知胡大罪皇上怒之甚也上曰
他無禮直呼皇后為張氏健頓首曰張氏指鶴齡非謂
皇后也上曰人謂婦人為氏健曰此則不同昔漢人曰
為劉氏者左祖宋人曰趙氏安而苗氏危蓋謂劉家趙
家也若曰張家天顏大悅即命出夢陽復其官

屈西
漢云

弘治中孝皇中人命一巡按以公錯箠一縣丞後丞病
死丞者中貴戚也丞子奏巡按箠死伊父下之都院當

巡按不應上讞上怒甚召大學士劉公健曰巡按故勘
承死而法司當以杖罪何也劉頓首曰凡上司箠死人
有三因公事如法責之邂逅致死謂之因公止應杖罪
復職非法用刑致死謂之酷刑問罪為民因讐挾私致
死始謂之故勘應抵命天顏怡悅謂劉曰朕省律未精
幾乎誤人今後遇此等事卿須盡言孝皇從善如流且
又導之使言雖堯舜莫加焉何聖如之

屈西
溪云

崆峒密集云尚書韓忠定率九卿伏闕請劉瑾等下獄

太監李榮密傳旨已得允候明日即施行公等且退忠
定公云恐未的李公云此朝廷大事我此膊項是鐵葉
裏着敢虛說次日復傳旨已各打十五發落矣

崆峒記云正德初劉瑾等八人擅權忠定韓公具疏率
六卿請下八人獄伏闕不肯起太監李公榮諭意而忠
定出明日召六卿入衆懼叵測襄毅許公進同行至掖
門裏謂忠定曰不知汝疏中如何說忠定不答故拽履
而後

正德初劉瑾擅權肆虐流毒縉紳大則籍沒其家小則殺其身公卿而下竦息戰慄視之若雷電鬼神求希其意而不能測況敢與之講議乎吏部尚書張公彩入朝始敢進言凡事于順門講議虐政多所中止然後六部效之中外之情始通僉事吳廷舉劾瑾謹其疏中以他事必欲致之死彩申救得免他如御史劉寓生等皆得生還復起御史劉毅以示前日枷號之為公凡此皆以術勸說之

江西京官外調命已下矣彩勸止之

辦事官某以訐告授都察院司務已到任矣彩勸罷其官

大學士焦芳導瑾為惡劉宇首阿附瑾與瑾交厚甚密未易離間也彩皆勸退之

郎中高選戍宣府彩勸瑾復其官曰就令宣府管糧以動人之視聽

初劉瑾納賄皆萬金以上一日瑾召尚書張公彩飲情

既洽彩從容言曰凡各官饋送非取之官庫則科之小民下招民怨上損國儲凡貨財足用可也多亦無益瑾喜納之時有太監侍郎錦衣衛指揮勘事回餽白金二萬兩瑾怒奏發其事銀入官庫三人皆罷官

瑾不用東廠錦衣衛校尉訪事自命門下人名曰內行出外訪事甚為衣冠之禍大臣至有抄沒其家者張公彩言之瑾瑾遂罷之不遣

張公彩自恃其才足以轉移一世然乏忠靖之誠且有

驕矜之意逢時不理欲倚權宦以就事功雖謙抑敬慎且懼不免而況驕矜以促之易曰比之匪人不亦傷乎彩之謂也

大學士李公東陽約二僚置酒天寧寺請尚書張公彩以接慇懃之懽是日早東陽偕二僚親至彩第邀之彩尚未起命曰請坐喫茶既而復命曰請先行東陽等出笑曰張西麓直以辦事官待吾輩耳內閣係宰輔而相待如此彩之驕可知矣

尚書張公彰查大倉所積國初來歲積若干自正德元年冗食者多歲支過原額若干計數年後大倉空矣言之瑾稿已具郎中以稿示韓主事主事曰為我謝堂尊此事未可舉也昔韓琦富弼同心為相又值仁宗之明磨勘廕子之法一行幾乎殺身初琦不肯行至是弼中夜不寐繞床而行嘆曰韓琦真聖人今乃欲依權宦以行此事乎當睽隔之時不過小小救正而已郎中笑曰事已成無多言割了舌頭命既下內而永彬大用永成

諸權貴家衆所革尤多外而文武大臣章蔭者革之亦多且令其各還鄉里法令既嚴行之無漸由是內外皆怨而彩之禍基於此矣

瑾既就擒翼日張公彩收繫廷鞫當之結交近侍斬罪彩乃以十六事自辯皆歸之東陽謂某事某事部中如何處東陽皆票旨不依有原稿可察疏已下刑科時文選諸君適有事於科給事中出疏共觀未竟內閣命官將疏收入留中不出明日有旨再問彩遂坐以謀反

初張永自寧夏還瑾以旨止之良鄉令無進城明日將
又以旨發永南京策士勸永無奉命徑當入朝翼日早
瑾暨諸僚至順門故事謝恩見辭既畢當六卿議事諸
僚自瑾背後遂去瑾獨留是日諸僚欲退瑾以臂止之
曰今日之事當衆共議之諸君何往乃宣吏部尚書張
公彩上語久復曰宣兵部彩退止數步俯首若沉思狀
尚書王公上瑾頓足甚恨論說移時王公面色如土復
宣刑部未上忽中使直至曰有旨宣瑾瑾曰有何事中

使曰張公公進東華門矣瑾曰如何不待聖旨急促去
明日瑾就擒矣

今獻彙言所論頗有未當者如韓忠定一代偉人豈可
少訾正德初忠定匪躬竭節伏闕抗疏忠貫日月心獻
神明不幸為奸人泄其謀其事不成豈可以成敗論哉
湖州沈公蘋洲集所載甚公而彙言不錄何也

名臣錄作者數家惟彭司寇去取甚真自序論于忠愍
尤為切當

當國家豫泰事非臺諫進危言而死及幾死耳目所覩
記者在洪熙時學士李時勉論宮掖事已打折肋三支
押赴市曹行刑章監斬官路走來遲天威少霽命錦衣
衛監候在正統時學士劉球論時政得罪王振下錦衣
獄餓死衛官函球首送振觀在成化時主事林俊論計
曉事下錦衣獄弘治中主事李夢陽論張鶴齡下錦衣
獄在正德時有僉事吳廷舉論劉瑾下錦衣獄

當今文臣堪將帥之寄者惟太傅王公鉞耳塞外威寧

海子水草肥美林木茂盛北敵珍倚之羣聚於此數為大同患公巡撫大同提兵征之壯者或殺或遁老弱婦女皆俘之歸捷奏公封威寧伯後大同缺總兵官公以都督掛印充總兵官鎮守大同北敵畏之不敢侵入至今敵人每過海子望之而泣然以其地凶不再居公高才有宏畧作為詩詞新奇雄放出人意表

吐魯番逐忠順王據哈密城甘肅鎮守都督劉公寧偕巡撫都御史許公進提兵征之克其城復立忠順王而

還時塞外乏水軍馬困渴吐魯番率兵追之不及三十里而我軍入關魯兵引去

正德中河南鎮守廖太監姪愷入河南鄉試監臨以下皆取之監試僉事張公璉執不肯監臨與二司計出張僉事於外愷遂中式及宴張令徹出愷席不容愷與宴二司固勸之張知不可爭拂衣出不與宴

權寵之人若行好事如薦賢去惡益國利民之類便當獎與行之若以其出於權寵阻而不行則妨賢長惡病

國殃民在我矣天順中石國公薦儒者吳與弼吳一時之賢人君子也大學士李文達公因而用之未為不可彙言指此以文達為國公之黨且云為國公草薦疏草疏之事有無不可知國公欲薦賢不能自為疏而大臣代之亦可也假使魯欲誅顏子季氏力能救之而不能草疏托之孔子孔子辭而拒之可乎英廟委任文達有罔兼罔知之誠文達始終持廉秉公未嘗行一冒臆入一苞苴自後來觀之可謂富貴不能淫之大丈夫矣豈

可輕誣之哉

大學士劉公珏不拘拘於曲謹而有大節成化中欲易儲名內閣諸輔臣議他莫敢言公執不可上命出公立不退必欲得命上悟從之聞史冊不載此事

弘治中國戚張鶴齡時入禁宮侍宴太監何文鼎戒鶴齡曰祖宗有法非內官入此門者許諸人斬之國舅再無入鶴齡不悛一日復入侍文鼎仗劍立門外曰今日必誅鶴齡內使密報上命收縛文鼎鶴齡既出上面訊

文鼎曰汝內臣安能如此是誰主使文鼎曰主使者二人皇上亦無如之何上曰彼為何人而我無如之何文鼎曰孔子孟子上曰孔孟古之聖賢如何主使文鼎曰孔孟著書教人為忠為孝臣自幼讀孔孟之書乃敢盡忠上怒命武士瓜擊之文鼎病瘡死

大學論新民曰平天下吾儒當國致治惟在於平否則為偏黨為惡不小矣書曰無黨無偏王道平平武定侯郭勛恃寵驕恣因為有罪何曾謀反無此而加之是誣

陷之也名曰扶公道其實害公道名曰惡惡而反自為惡厥罪均矣當時刑部尚書吳公山執而不肯衆議紛紛臺諫交論吳公不動為民去識者謂吳為真刑部尚書可謂天下非之而不顧矣

都御史胡守中拜郭勛夫婦為父母勛敗守中劾之後守中以罪下獄勛面罵曰我雖不曾生下汝汝夫婦也曾叫爺叫娘乃劾我耶可謂萬世士者之羞矣胡守中之死於律亦欠合今之所論非以守中曾為都御史也

非以守中曾中進士也直以盜論守中耳守中乃當死之盜耶不當死之盜耶強盜得財者斬不得財者徒監守自盜得財者准徒不得財者不應耳守中雖聽許銀八千兩銀尚在庫未到守中之手乃監守自盜不得財者也豈可坐以死罪誅一守中如芟一腐草耳何足惜哉明明之法可惜也

孝皇賓天中使持其白綾血衣慟哭曰古今有幾箇這等聖人因言孝皇方御膳金夫人泣訴主事李夢陽事

曰皇上在夢陽尚敢如此他日我家無遺育矣固請罪
夢陽孝皇怒揮膳而起終不罪夢陽

左都御史戴公珊屢以疾辭孝皇不得已使中使諭曰
既不肯留君臣之情可不一面辭乎珊扶病入辭孝皇
見其羸弱曰卿真病也賜茶珊叩頭辭上泣下曰與卿
長別矣珊復叩頭曰臣不去也上揮淚曰却不好數月
珊卒于京山忠亮不阿始終以道自持

弘治中周公經為戶部尚書孝皇欲起一別宮患缺用

左右曰何不取之戶部上曰周經得無不可乎左右曰
皇上取之經豈不與命下經曰此軍儲也不可動奏上
上欲已之左右曰命既下豈可中止復下之部左侍郎
韓公文復上奏上亦欲已之左右曰不准尚書奏豈可
准侍郎復下之部右侍郎許公進復上奏上顧謂左右
曰朕謂不可果然若不已之明日科道又言矣遂報罷
英皇既退大學士李公賢命吏部推簡久不上英皇召
尚書王公翱問故翱曰皇上既退賢必求一人勝於賢

或與賢等者方可英皇曰李賢果何如翱曰本分人也
廷臣無有過於賢者英皇復召賢入內閣

吏部久任尚書王公翱十餘年初尚書王公直掌印翱
副之然事皆決於翱後直去位翱專為尚書尹公旻侍
郎尚書亦十餘年當其時也吏稱其職民安其業

初大學士萬公安素鮮文學圖為祭酒而時不與適祭
酒缺吏部推安為首邢公讓次之安讓私第相連侍郎
與讓厚者書一小帖曰萬首邢次意在其次九之過讓

第適安之子戲讓第門侍郎以為讓之子也投其帖于
子安見之甚恨既而果黜讓為祭酒後安認萬妃為同
宗入內閣誣收繫讓枷于監門前奪其官後並逐尚書
尹公旻

孝皇重人命陝西巡按御史李興恃才舞智任刑執法
人多死杖下巡撫都御史列其箠死之人奏興曰養犬
所以防盜今不吠盜而吠主養猫所以捕鼠今不捕鼠
而捕鷄設官所以安民今不安民而殺民孝皇以其箠

死人命數多震怒收興廷訊當斬吏部尚書王公恕陝西三原人也初興巡歷至三原搜索王家無所得黜其儒學生員大半至是王公上疏論救謂興執法不撓克盡憲職孝皇素重恕興免死打一百邊遠充軍

宮人鄭金蓮其兄火者鄭某鄭金蓮與宮人王女兒同宮為火者言皇儲為王女兒所出火者告之王女兒家人共趨之稱為皇親王女兒父兄王某等一時炫赫緝事衙門奏聞孝皇以事干宮闈親御玄武門鞠之鄭金

蓮篋死火者斬于市王女兒收入宮王某等問罪發之
里

成化中給事中鄒某左遷蕭山知縣蕭山人御史王某
以事充軍潛回里二人皆恃才放縱不拘禮法初交甚
懽後不相下久構為讐鄒惟以逃軍解王預寫文書僉
定解人路費馬匹俱已預備久不得見一日王飲于三
十里之外鄒命解人即席縛之行王家知之已遲鄒又
使人截于途追不能及至廣信王以病死王之子欲報

之鄒防之謹後鄒陞按察司僉事飲于饒家還王子率家衆縛鄒剗其兩目實目孔以灰置之糞舟中鄒乃不死告之官王子當絞後大學士蘇州王公鏊悉其故因是釋之文士撰為戲文今扮演盛行扮鄒者以銅為二目納之以灰備諸醜態

苑洛集卷十九

欽定四庫全書

苑洛集卷二十

明 韓邦奇 撰

見聞考隨錄三

出主降神叅神初亞終獻飲福徹饌送神為九獻

樂書云鐘以相生擊之擊宮則及徵次商次羽次角應宮者為徵初不拘於定位也

奏黃鐘一均之備至蕤賓七聲下生大吕故大吕起一均則

黃鐘為商矣此左旋也又歌大呂五生為仲呂一均之備雖
右轉然左轉隔五而為太簇起調皆天然也豈人為之私哉
聲所以有二變只為黃鐘之角不能接下調大呂之宮故
有二變夾鐘以黃鐘為羽又用黃鐘之羽故曰羽之羽周
樂起調終調零星補湊可疑然其節奏亦合倡和亦妙周
變九六八甚牽合難通

聲之有七自然之數非聖人以理推排也先儒或謂當用
二變或謂不當用二變皆臆說也

凡聲至七生則過律一自其長短之序無一毫之紊如黃鍾至七聲盡為蕤賓蕤賓實生大呂少一不得多一不得十二律皆然

律呂之全與正不同全是十二律長短之數正是十二律三分損益隔八相生之正數如黃鍾九寸正也三分損一隔八下生林鍾六寸為正林鍾三分益一隔八上生太簇八寸為正太簇三分損一隔八下生南呂五寸三分為正南呂三分益一隔八上生姑洗七寸一分為

正姑洗三分損一隔八下生應鍾四寸六分有奇為正
應鍾三分益一隔八上生蕤賓六寸二分有奇為正皆
全也蕤賓三分損一隔八下生大呂四寸一分有奇為
正非全也大呂三分益一隔八上生夷則五寸五分有
奇為正夷則三分損一隔八下生夾鍾三寸六分有奇
為正非全也夾鍾三分益一隔八上生無射四寸八分
有奇為正無射三分損一隔八下生仲呂三寸二分有
奇為正非全也正若何而非全大呂為黃鍾之次十二

月之管若止用正數其管短甚何以為用必倍其正數方可為黃鐘之次此亦非聖人以意倍之也自然之數也蓋黃鐘七音既畢為蕤賓蕤賓生大呂以起宮自然之妙如此必倍之而后謂之全夾鐘仲呂倣此所謂在陽倍之是也

惟黃鐘一均皆用正不用半七聲回宮亦用正十二律回宮亦用正

中聲者固為難曉然必自下學始器數是也真積力久

豈終不可得哉蓋久則精精則神凡事皆然先儒類慕中聲之妙馳心高遠謂不必屑屑於器數之末既不從事於下學安能上達哉正猶孟子之論聖神然必自善信始也夫能撫琴然後可以得琴之妙能鼓瑟然後可以得瑟之妙然撫琴難鼓瑟易而近古反不達瑟者以不傳也以易也故不傳必能吹排簫然後得排簫之妙必能吹笙笛然後得笙笛之妙然笙笛難而排簫易近古反不達排簫者以不傳也以易也故不傳鐘磬則惟

製造之難耳

管聲有不協者或二孔取一聲或三孔取一聲或四孔取一聲此樂家之用變也

瑟隔十二絃應備樂須用五十絃此製瑟之初所以五十絃也今以六陰律折馬後二十七絃足矣今以六絃應者後世簡便之法也排簫亦以十二管應今隔八應者以相生之次也徵無定在應宮者為徵短者倡而長者和以長律為準

瑟絃隔六應自然之序不可易也古人以中絃不用前十二絃為十二律之正聲後十二絃為十二律之應聲當作兩架調第十三絃之聲即第六絃之聲也瑟馬自不能齊一

瑟古人常用琴則用之者少如由之瑟曾點鼓瑟孔子取瑟而歌三見於論語

宮動而徵應商動而羽應角動而變宮應變徵動而七聲盡復回宮天然之數也

宮徵各當其位惟琴之九徽為然三絃跌半徽者待變徵也七絃為大吕天然之妙已著於桑梓之上不待伶倫而後成也

若七聲回宮第一絃中絃不用至二十七絃折馬後為變宮十二律足矣備樂須用三十七絃除頭三絃中絃不用宋時蜀人掇得三十六管玉笙上之正於此瑟合古人重樂器得美玉皆為笙磬簫笛

甲申大同之變都御史張公文錦巡撫地方初宸濠之

變文錦守安慶濠兵至城下百計攻之文錦仗忠義誓士民竭力拒守濠氣大沮賊黨皆怠有散去者及濠敗文錦以功超遷至巡撫文錦思圖報稱性本急功喜事好剛忽衆而又嗇於用財故激成此變大同鎮城孤懸極邊與外敵共處一地無寸山尺水之隔堅城深池設以重兵治以總兵巡撫副總兵兩遊擊都司守巡郎中府縣城以裏立衛所州縣城堡大城臨邊以禦外侮使小得以安內附小城聯絡於內以為大城之拱衛此我

祖宗神謀聖算經略之宏規也文錦顧以鎮城之重反在極邊欲作五堡以為藩蔽幸而其事不成文錦以身當之使其事成後來將為國家之患矣初文錦將營五堡衆皆以為不可而莫敢言事下前左叅議左叅以三十萬計報並報總制臧公鳳鳳笑曰五堡脩不成矣左叅議曰何以知之鳳曰張巡撫視國之財如家之財安能捐三十萬金以成此堡乎左叅亦笑文錦果已之繼前左叅議者右叅議以三萬計上文錦決意行之即

具奏上聞營造間財用甚少成命業已下乃撥軍入山伐材木燒灰瓦叅將賈鑑督工嚴急軍心已怨堡既成苟率太甚每軍營房一間及撥戍軍皆憚行文錦示以公撥麾下官軍往於是總兵太監皆撥其麾下不充其數以伐木軍足之三堂麾下官軍素驕逸固已不堪矣諸軍告願單身分番而往文錦必欲帶妻子常駐諸軍相謀曰人各有妻子或女又有馬匹一間營房何以能容且莫說敵人來只秋深一陣大風雨一家死矣等死

也不如殺了賈叅將投入北中遂殺鑑文錦使人招諸
軍回城而虎狼入室矣諸軍見文錦文錦曰汝輩來了
我的賈叅將何在不即為處分居數日奸桀者倡曰張
都堂潛行出城赴京具奏諸軍相聚至都察院奪門而
入文錦懼踰垣匿宗室第諸軍遂搶檢家財勢不能已
矣執家人欲殺之問文錦所往告以匿宗室諸軍環譟
宗室第宗室出文錦衆爭殺之總兵知府出走兩遊擊
郎中匿民間為首者號於衆曰衆人莫懼但同心共事

他日問罪不過將我輩首惡十數人與之而已廷臣以文錦激變請詔宥旨既至開讀諸軍跪聽諸軍相顧曰此安我也豈有殺巡撫遊擊而不問者乎有起而伏匿者既畢詔使倉皇而回衆心洶洶以兵守四門朝廷簡都督桂公勇為總兵官太監武公忠為鎮守起復左叅議於家分守大同既到任請入大同御史儲公良材曰大同城中如血海公此行如以肉投虎口何益之有如是公手中事死生以之可也今他人壞事而公往死之

非義也左叅曰諸公終日言大同事叅議大同官在此
於心何安且作亂者大同一城耳冀北十七衛所州縣
豈皆作亂乎叅議出鴈門量可而進且以繫屬冀北人
心儲公曰如此可也八月左叅既出鴈門自度已與大
同之人素無讐嫌朝廷既有恩赦而軍士猶不靖者無
主耳乃直抵西安驛西安去大同城才六十里耳大同
城中大驚探事者二人故恐左叅露刃而上言大同不
可入左叅曰汝回報大同城我明日決進是夜又故放

火燒叅將宅以恐左叅明日左叅竟入大同亂軍嚴兵
露刃城門內外然不敢失迎接之禮大同心由是少
安時城中無一文職出政者獨左叅一人耳乃約法兩
條以禁軍士之暴餘皆以無事處之下令於邊關曰一
切人等非有本道關防不得放過有應行者皆便宜行
之初不以條格拘左右或以為僭左叅曰以此得罪亦
所不恤甫兩月地方大安而巡撫都御史蔡公天佑始
至

拾月蔡公至代州左叅插四大營於鴈門關下親帥四
守備令盛裝戎服謁蔡公於代邸蔡公驚曰公何為如
此左叅曰叅議豈過為奉上者大同變後巡撫之威甚
削大同人止知有叅議耳不身先降禮何以帥衆且言
插營蔡公固欲散營軍曰公既出大同又盛陳武備大
同人必疑吾與公圖彼豈不生變左叅曰叅議已有處
謁公後即先入大同叅議既入大同則人心安矣蔡公
曰善左叅即晝夜馳入大同時有譏左叅過於奉上者

左叅以李愬迎裴論試應州諸生蔡公既至大同左叅約法地方便宜二十六條上之蔡公曰善就作我巡撫條約令大同推官馬隆榜示所屬人心大悅左叅治大同獨尚嚴武公素不悅左叅於會中大言曰我輩安心樂飲地方或再有變自有頂綱之人蓋謂左叅也

拾壹月蔡公會同桂公及左叅僉事因捕盜桂公率遊兵擒逆軍八十人杖殺之遼陽某叅將帥所部軍趨甘肅過大同地方人閉堡不容止宿叅將軍罵曰會與延

綏軍殺此反賊戶部李主事齎接濟銀兩來或曰此賞
征大同軍之銀以此三事奸人乘機互相恐動初七日
夜二鼓變作砲喊之聲震天諸軍先趨左叅分司叩門
呼曰書吏出來書吏出左叅亦出軍士曰叅議老爹天
心地方恩府速報左叅老爹安心還來回話若驚動左
叅老爹寸斬不饒書吏曰左叅老爹在此左叅問以作
變之由軍士言朝廷赦小的衆老爹必欲殺之左叅告
以原無相害之意再三諭止之諸軍曰遼陽兵已至城

下奸細以遼陽鞍子為號已拿得矣老爹去睡三堂今夜一箇不留揮其兵進且分兵至李主事分司要出賣銀文書者為何事又分兵至鎮守府武公極其困辱分兵至總兵府桂公不屈諸軍喧噪桂公曰殺便殺何用喧噪衆曰既無殺我輩之心如何將家小暗送出城乃要桂公妻女出見至都察院要巡撫出再三論說軍士曰此與左叅之說同且止之初八日黎明左叅升堂如平時出謁巡撫時亂軍填塞道路見左叅出皆分道立

旁時巡撫門尚未啓扣門而入巡撫迎左叅笑曰紀綱
何在地方想無事矣不然公何以得至此今計將安出
左叅曰彼未曾殺人犯上搶掠尚可招來面諭左叅回
司治酒召郎中主事分巡共飲諸公曰地方有事宜早
散左叅曰彼豈草竊者乎殺人豈問昏明徒示弱耳二
鼓方散初九日總兵遣我軍按伏時大風雪出西門外
衆曰五堡軍殺都堂叅將且無事我輩且按伏耶吶喊
而散是夜更初砲喊者三四面俱起不但五堡亂軍而

已圍桂總兵宅左叅自書告示一通備陳禍福利害話
言曉之令書手關路持往招之左叅自出立於道中已
而見西南火起問過軍曰火何也答曰殺桂總兵焚其
宅耳左叅令關路還曰彼既為逆招來何用左叅乃回
司閉門時月正午左叅召書吏人等誓曰彼既殺三堂
必迫我為主或令討赦二者皆不可待彼攻破司門則
我已自處矣事定後朝廷必遣京官來勅汝輩詳記我
二夜所行所言以告之然實非殺桂總兵乃大同縣火

起知縣死焉巡撫遣人諭之初十日左叅謁巡撫以所書告示示巡撫巡撫曰善命書數十張榜諭通衢巡撫曰何以處之左叅曰必須面諭乃約總兵鎮守太監郎中叅將副總兵遊擊會都司路經代府代王梯牆而語至午不了時五步之外兵戈林立左叅恐變生大言曰各官諸軍尚未早飯王請回宮既至都司無一人言者總兵乃言欲致仕歸衆亦不應左叅曰君掛斗大金印是我分守關防耶今日請公安諭地方何言致仕總兵

怒起而出諸公知諸軍怒總兵無敢留者左叅隨之而出時諸軍皆在二門外左叅自度可因此發言乃謂諸軍曰汝桂老爹欲去汝輩捨得耶諸軍皆跪曰好總兵不要錢不欠糧草只是心狠耳總兵曰我與左叅老爹不同左叅老爹是汝父母問汝饑寒者我是汝師長鞭汝皮膚者今日倒持太阿倉庫城池汝輩據之旗牌兵器汝輩搶之留我何用且軍法遣之不行輕則杖之一百重則斫頭汝輩得依我乎諸軍曰小的每日食朝廷

之糧如何不受總兵之命左叅笑曰諸軍說你心狠真箇心狠諸軍捨不得你去你如何捨得諸軍去也拉總兵入命諸軍隨之而入左叅及總兵坐定諸軍皆跪於堂下諸公無一人發言者左叅以天將暮諸軍久跪不見處分恐又生變問曰朝廷已赦汝輩乃又如此何也諸軍曰朝廷雖赦小的老爹們不肯赦小的左叅曰何以言之諸軍曰捕盜止是指揮耳遊擊將軍非邊患不調今乃以遊擊兵巡捕是欲殺小的也左叅曰汝輩固

未見遊擊兵巡捕吾亦未見明盛明甲白日打劫王府者如此為盜則如此捕盜耳諸軍曰小的每其實驚慌望老爹徹去遊擊兵今後再有為盜者小的每自相擒來好便待秋後處決否則就便打死左叅曰你們若如此守法即便徹了遊兵才省我行糧耳諸軍請各巷口立柵門左叅曰門外也有你們門裏也有你們立柵門何用你們自編火甲禁防盜賊可也諸軍又曰屯糧實納不起太監武公知此糧決不可免欲激怒諸軍謂左

叅曰此事亦先生處分左叅曰屯糧之納王府食乎各
官食乎汝諸軍自食耳奈何不納諸軍曰正經屯糧如
何不納張老爹將無影荒糧每軍派與三斗如何納得
左叅曰此糧不但今日我初到大同時便已行查尚未
回報屯糧照舊徵納荒糧查明蠲免衆應曰諾其聲如
雷左叅笑謂武公曰亦處分矣諸公曰可以具奏矣奏
草亦煩左叅為之就對衆公堂一揮筆可也稿成諸公
傳覽稱善三堂各令寫本人寫就各用印實封即時差

人出城奏聞地方稍安奏下兵部朝廷以大同逆軍再犯不悛簡侍郎胡公瓚為文提督都督魯公綱為武提督出師問罪勅內開寫首惡郭疤子等十三人的名仍勅瓚等若大同送出首惡即便班師如不送出進兵征勦瓚等駐師天城密行總兵巡撫取首惡郭疤子十三人逆軍羣噪於帥府曰進本討赦却請的兵來時逆軍知取首惡而不知有的名蔡公諭曰朝廷止取首惡餘皆受賞前日擒殺八十人可作首惡你們都該受賞矣

替你奏本班師奏既上衆心稍安諸首惡皆係三堂頭領在三堂肘掖之下每三堂有行必叅其議於是桂公獨定密謀伏兵於宅後烹羊煮酒召郭疤子等議賞格議畢令入後飲酒至則當頭一銅瓜打倒拉入堂後斬首如此者殺十一人最後者二人同至議畢令入飲酒二人者覺其形色異常奪門而走上營房大叫曰總兵拏首惡俚桂公親提兵捕獲斬其首送赴提督軍門即以提督印信告示明告諸軍曰首惡皆有的名今已擒

獲餘皆當賞矣人無譁者偉哉桂公此功身墜滄海之中而能擒斬鯨鯢於藩落顧始壞於人之輕動終掩於人之沮抑紀事者又不宣之惜哉捷至軍門胡公宴諸叅佐諸公稱頌功德不已左叅曰明公功德非言所能盡叅議觀桂勇之功出於計取而非力勝也若明公止照勅旨首惡既得即便明出告示散賞班師倘明公愈諸軍之逆必欲進征則非叅議所宜言胡公不語少頃左叅曰日將暮矣明公宜早決遲恐生變胡公曰少叅

飲酒我有軍法以違令者斬木牌置左叅之前諸將佐
皆散出胡公召大同聽事者夜不收入加以刑令再報
首惡數十人以鈞牌付千戶馬勇胡公素愛勇恐其有
言告勇曰汝毋多言言則斬首矣勇知其不可而不敢
言領牌而出然聽事者已逃回報大同城軍矣復以鈞
牌大書副總兵時陳左叅議領所部軍圍大同城東西
南三面城門子時起身違誤泄漏者斬露布而下起鼓
時馬勇倉皇至左叅道告左叅以再取首惡之故且曰

老爹們千言萬語如金如玉大同人皆不信逆軍之言
大同人信之如著龜何也上人失信故耳朝廷勅旨送
出首惡班師給賞今首惡既得已出告示給賞班師今
又取首惡禍變不淺矣使君不言誰再敢言左叅取圍
城牌示勇曰其牌如此我豈可再入勇咨嗟而去二鼓
時時陳呼門不得越牆而入至左叅卧所曰大同城中
精兵五萬我與公部下三千安能為敵且時陳圍南門
公圍東門誰則圍西門我寧為違令之將死於軍門豈

肯為敗將死於城下胡桃大字史書上要寫時陳姓名
左叅曰恐胡公有別謀若違誤其罪在我輩且牌有吾
輩起身時刻而無到城下時刻第徐徐而行令人稟魯
提督轉達胡公陳曰既露布而出何言泄漏有何他謀
直漫為耳既而果報曰且駐兵聚落堡時城中已得再
取首惡之報逆軍號衆軍曰我說殺了首惡便殺五堡
軍殺了五堡軍便屠城你們不信如今如何又取首惡
於是衆軍哄然而起收勇家衆男女一十九人皆殺之

仍活剖四人腹去其腸胃着以衣冠柱之以杖二死人把勇宅門二死人把帥府門餘皆懸首通衢擁勇出於市欲殺之斬副總兵隨之蔡公出救諭衆曰殺了桂總兵家衆也無查考殺了總兵如何回報朝廷斬曰蔡老爹說的是一軍斫斬首血流被面復以刀斫蔡公轎蔡公曰我替你們做好事你們思量衆曰也罷葉總兵家眷最多着葉總兵寫箇領狀領了桂總兵去若走了桂總兵葉家一家寸斬不饒諸軍於獄中取出舊總兵朱

振立為總兵馬勇不得入城回以變告胡公取牌引燭
焚之謂勇曰無令人知遂班師而歸乃隱其別情奏言
如勅旨既得首惡因以班師至於囚桂勇立朱振則不
可聞乃奏言桂勇宜回府辦事又薦朱振堪為總兵兵
部亦朦朧覆奏從之茲事也首惡既得若即便班師而
不再妄動則朝廷恩威兩著紀綱肅然振舉及其激成
禍變正宜赫然揮戈進兵征勦却乃狼狽而歸於是乎
大同紀綱廢墜不可收拾矣殺戮之慘不足言也後半

年桂公猶在囚中蔡公再三開諭始放之歸大同諸志無一字實者因著其大略而未及詳也

黃鍾為宮天下之君也十一律為宮列國之君也故黃鍾不為他律役

人之聲有得黃鍾者有得應鍾者於中皆有宮商角徵羽人聲高下不外乎十二律

徵律接商律反宮律而用之以應律為準如琴九徽一絃為宮四絃為徵若以徵接商則以五絃為徵不敢以

下陵上也

造化人心不過動靜兩端而已纔離於動便屬靜纔離於靜便屬動古之聖賢只說動靜於中捻出一幾字已屬之動矣

冬至一歲正氣之首子之始也歷家截其中而用之子之前半尚屬去歲然復卦中無坤泰卦中無臨子月帶亥月之半寅月帶丑月之半天心安得無改移哉

動有二靜惟一有大動有小動無小靜大靜也陽常有

餘陰常不足故也

經世數始終天地十二萬九千餘年太乙數至今已十五萬餘年二家之論不同經世康節獨得之學後人用之多不驗太乙是與天地筭命先立下箇八字然後推算中間頭緒頗多既排諸星又論三元又論七十二候又論卦運又論陽九百六又論得地失地得失之濟吉凶所關不以常例拘又論筭數和與不和又論八門中間細目又有掩迫關囚之類學者一有不詳誤人多矣

晝夜者開闢渾沌之小象也開闢之極即漸渾沌渾沌之極即漸開闢無一息之停

乾元亨利貞乾字是伏羲的卦元亨利貞是文王繫的辭乾卦中有箇大通至正的道理故文王繫以元亨利貞之辭有四樣解說各不相關其一以卜筮言上古所傳朱子之本義是也其二大哉乾元雲行雨施乾道變化三節是說乾字是天元亨是春夏生長物利貞是秋冬收藏物如曰乾元亨利貞者天以春夏秋冬生長收

藏萬物之謂也此以造化解也其三大明終始首出庶
物二節是說乾字是聖人之德元亨是聖人得位利貞
是成天下之治如曰乾元亨利貞者以聖人之德在天
子之位成天下之治之謂也此以聖人功業解也其四
元者善之長也君子體仁長人君子行此四德三節是
說乾是健元亨利貞是仁義禮智如曰乾元亨利貞者
君子以健而行仁義禮智之謂也此又以君子之學解
也其他倣此

龍德而隱是有聖人之德而隱若伊呂之徒聖人樂則行之是他本欲見是之人今不見是而無悶如巢許之徒彼自忘世矣不必言無悶也若林和靖四皓隱士耳非龍德而隱也

剛健中正都在龍德上正中以時位言也庸言四句是龍德意德博一句是正中意向非出潛離隱何以能化哉庸言庸行之信謹正見德之盛處蓋凡於朝廷宗廟及衆所觀聽之際信之謹之但有德者皆能至於尋常

小小言行非德之至純者鮮所不忽邪字指外物或指心之私以言行言之亦可邪乃誠之害也故閑邪所以存其誠善字德字皆指上三句言博是及人之博指化而言

忠信是進德之本修辭是居業之本朱子小字所謂有此心方會進德是也知至至之就是進德知終終之就是居業蓋惟有此忠信之心而后能知至至之有此修辭之誠而后能知終終之上至字是理之極處下至字

是求要到去那地位終是已到此修辭立誠地位下終
字是守之悠久至是指理之極處言終是就理之歸宿
言其實一也但自理之至而言謂之至自吾已到謂之
終能知至而求至則知之已真故能於念慮萌動處審
其善惡而能存之能知終終之則行之已熟故能泛應
曲當從心所欲皆合理節是能權而化也

大抵此文重進字上蓋進退無恒便見欲進上下不常
便見欲上退不是自上而退是原所處本等之位進便

是進不進只在原處地位上便是退蓋欲進而不能進便是進退無常也上下亦然

上即物類之同明聖人與人同類作而人覩下又即物類以見聖人之所以作而人覩者以其同類相從故也無位無民尚可至於貴而無位高而無民尤為危道也如宋孝宗既禪光宗漢獻受制於強諸侯是也楚霸王可謂賢不輔如子房陳平韓信英彭俱去而從漢無民從出乎人位之外亦可

順健者非是順而又健順而健也蓋順而無一息之不
順方為順而健固守其順者也若有一毫健焉則非健
矣所以謂之坤有一毫之健即復卦也乾曰元亨利貞
坤曰元亨利牝馬之貞乾之時君子以正自持便了坤
之時正固不可離然須和柔委曲方能行之此君子處
治亂之道也

坤厚載物德合無疆厚字指坤之德是化機之亨氣載
物是物之亨也此無疆是乾之亨品物流形者也含弘

光大即厚德亦指化機說含弘言無處無之其含甚弘也光大是昭著於兩間其光甚大也如夏氣一動無處無之是含弘含字是容字不是含藏之含夏氣之熱是其光明著見而大也未說到物上到咸亨始到物矣易道固當因時也要論自家材器坤之時本不可為也有直方大之德亦可為也商山四皓是六四之材只可隱處若不自量而出如酈生之徒殺身必矣蕭何張良有直方大之用也

上六龍戰陽雖衰猶龍也陰雖非龍盛則亦龍矣故稱龍戰或以龍只指陽言陰與陽戰也未見正義如臣之於君夷狄之於中國是也

餘慶餘殃起於一念之善不善弑君弑父由於一念之僭逆若堅冰之由於履霜也當臣子初萌僭逆背逆之時就曲處之則可免禍若其勢已成而方辨之則禍立至如王莽司馬氏方其匿情求名及初握兵柄時處之何難直至平帝高貴鄉公時乃以晨星之從方欲奮於

一戈其能免賈充鳩酒之禍哉辨之不早辨也不早辨尤不若不辨也

當屯之時既有濟屯之才如何又不遽進理勢當如此也彼秦隋之亂極矣陳勝李密之徒既無亨屯之才又不知未可遽進之義時未可而攸往適足以殺身為真王之驅除漢高祖唐太宗負濟屯之才知其未可攸往也方且潛龍於芒碭晉陽之間待時而動天下一笑時乎時乎讀易君子尚其玩之此興亡之幾也

建侯而不寧楚項王既分列諸侯自都彭城而驕得非
建侯而寧者楚之亡也忽焉聖人之言可謂必應者矣
可畏哉

君子經綸雲雷要見草昧意方見是屯又要見未通意
經是總其綱綸是分其目綱目備舉大小不遺方成濟
屯之功漢萬目不舉經而未綸也

屯如遭如屯是為其所難遭是遲回不進是蓋人有濟
屯之才上亦有可為之君而為權幸所羈也然權幸初

非有害我之意蓋欲以勢利籠絡納交於我耳但君子守正不為所籠絡至於久而必通權幸之妄求者去而九五之明君合矣女子貞不字馬融之就梁冀班固之從竇憲可謂不守女子之貞者矣

屯其膏陽剛中正居尊有應本可為者但為坎體身居陰中已既難為六二才弱不足以濟既無人宣其化初九得民於下又有人阻其化此其所以終不能為也如晉時簡文雖賢王謝之才本弱桓溫又擅其權於下禮

樂征伐其能以號天下乎

蒙亨斷作明者發蒙一邊說為是本義乃占法也如比卦云若欲比人則亦以是而反觀之耳此證最明童蒙求我重明者自重不為童蒙求教之切也筮者明則人當求我而暗者固有亨道也筮者暗則我當求人而暗者亦有亨道也利貞亦是筮者明則明者教暗當以正筮者暗亦是明者教暗當以正也

利用刑人是立法要嚴用說桎梏是那用的刑罰寬

此子蓋發蒙之道當嚴以督之然不可強其必能若有未通時徐徐待他自省若不管淺深逼著他時則反無益於蒙而我遂失了發蒙之道非吝而何吝是發蒙者之吝刑人是刑杖之人用是人以治人也

治蒙過剛正是我擊蒙為蒙寇害也取必太過攻治太深是害了蒙者故不當過嚴外誘是害乎蒙者則當過嚴利不利只當不當耳

孚以心言蓋人於當需之事雖勉以需之而心或有欲

速者非需也故以孚為言言實心以需之也光亨亦是心中如此蓋人於事之當待者稍有外慕則急躁煩擾便不光明通達矣貞以事言若心能待凡諸所行又要俱合理不可非理是從言所行也不是為僥幸求進之事以進仕一事言此心待命畧無求仕之心然不可謂無求仕之心而所為全不致謹又於凡事都要守理不是不為求進之事也此卦於人之居常遇變安於知命居易盡性處說得委曲詳盡學者苟留心則平生無不

足之事矣

入于穴敬之以上是象終吉是占三陽有援人之力者本欲害已因以敬而反救已昔文天祥囚於元元使人監之天祥朝夕誠意待之久而反親指示南歸之途天祥遂脫難正合此爻也

利用恒是本象以著占需于郊而可能久耐也故曰恒利是險可濟

九三居坎體之下去險愈近則是將陷於險而需之也

然能用恒於需猶之可也況又過剛不中輕進妄動以趨之則致外侮之至而為害大矣其象如此占者之凶不言可知

此與彖傳對貞即需于酒食此處需于酒食是象彖傳為有孚得正之象則需于酒食包孚正二意此處貞是占即彖傳有孚貞之占辭

室還是不遇聽訟之好人或曰五中正大人若何而又為不正耶主二而言則非正應矣易隨又取象正不可

如此拘吉字只是窒有通終凶者以訟不可成故也蓋終其訟不惟曲者凶而直者亦凶

天與水違行天勢下行水勢上行故曰違行不是天在上水在下也

剛為險主正是險而健本欲訟然一則以有柔中之德一則以勢不可敵故不克訟彼非純德者但有柔中耳使其勢可敵彼亦敵之矣若更無這些德時雖遇不可敵之人彼亦不量力而與之抗矣

或錫之鞶帶本義終字勝字俱工皆從剛字來因恃其剛故終其訟又取勝或字當玩蓋無理訟本不能取勝而或有勝焉非定理也

此彖辭全以理言之卦中原無此意又一例也

爻中本無律與否臧之意只據初爻為出師之始遂以理言出師之始當如此也與卦辭同

不寧方來後夫凶愚意一串觀本義中將字又字可見將者欲歸未歸也蓋未歸亦不安思欲歸之即歸之則

可矣中間又有疑豫而不歸則凶後夫即不寧者也如後漢隗囂幾欲歸光武所謂不寧方來者何乃又遲疑而不往故終誅死竇融不寧即來矣封侯永世不亦宜乎

比之匪人不亦傷乎士君子寧孤立無助不失身於可賤之人古之人如班固之於竇憲蔡邕之於董卓柳子厚之於王叔文是可傷也若夫卑卑小輩何足以為傷乎近時如張西麓欲依劉瑾以行其志遂至殺身亡家

可傷之甚也若夫楊遇石文義之徒何足以為傷乎

畜未極而施未行下指陰說是言所畜者小之義別在
人事上取一象蓋言君子當羣小見沮之時雖可亨然
終不能大有所為如李綱見沮於汪黃雖未能便退以
李綱終為他打擾終亦不成大事紂雖不能殺文王是
文王尚可亨然終不能施德於天下到後來畜極則三
分有二可遠施矣

陽本是在上的今欲復進而上然其進而上也由乎正

道而進自由也道者進之具也復不是復於道是復其上
位由道而復也无咎是進得好吉是進而無阻

與說輻夫妻反目說盡小人之情狀古人所謂其暫為
朋者偽也蓋本諸此

有孚血去惕出无咎此不以小人畜君子言亦不是才
弱的又只在勢弱位卑耳有孚是柔順得正虛巽者誠
實而無虛假也二陽助之孚之所感也體字是外對中
而言皆爻義占在外柔順得正虛中巽體二陽助之是

有孚之象陰本不能畜陽是血惕之象然柔順得正虛中巽體二陽助之而能畜陽是血去惕出之象无咎宜矣

還是小人極盛朋黨固結分布天下勢成事就之時尚德載正是非一朝一夕之故此爻如曹操武后之流荀彧周來之輩所謂征凶者也陰陽和只是為雨而言非是君子與小人和也月幾望是象以陰勝為貞然加於陽則不可故厲君子陽也故往則凶俱指占者既雨既

處是盛尚德載是畜極正與上畜未極而施未行對
蓋履有所躡而進之義也伏羲以此卦以柔履剛是能
盡履危之道而可不見傷為可進有躡而進之之義故
名其為履文王係辭亦只就伏羲名卦之義即卦德以
著其象言以和悅而躡剛強之後則雖履危而不見傷
為可進故本義不別解卦名只於和悅以躡剛強之後
有履虎尾而不見傷之象故名卦為履以見卦為履者
以其和悅以躡剛強雖履危而不見傷之象之義也如

訟卦伏羲名卦之義以上剛下險內險外健已險彼健而文王係辭即取是象窒惕之義是名卦與係辭之義不同故本義別解之先解卦所以為訟而後係辭之意此是伏羲名卦與文王係辭只一義故總解之至其占亦只是此義故云而占如是也

眇能視至咥人一串說是不以和悅履剛強取象雖不一然皆本於不中不正才柔而志剛來也柔而志剛貼武夫為大君是帶說柔而志剛為大君必定肆暴非是

為武者便才弱而志剛是才弱志剛的喚作武人若才剛志剛則為名將矣

無平不陂泰將極而去也無往不復否去久而來也艱貞艱是思慮貞是施為食是亨意如食舊德之食無往不復以上是天運不能無艱貞以下是人事所當盡此是保泰而得其效也

否之匪人是文義下二句方是占貞正是泰之九二爻中行之道也君不君臣不臣便非人道大往小來是言

不利君子貞之故

榮字是加字此非君子輕祿人不能用也蓋君子歛其德人不知為君子自不得以祿加之如漢龔勝非歛德者為王莽逼迫而死

否傾固天運如此還因君子有陽剛之德所謂天下大亂非高光之才不能定也

曠遠無私只是這裏也同那裏也同不偏厚在一邊於人無彼此是所同者無私非所同之事無私也未可說

到天下一家中國一人上亨與利涉俱從于野上來利涉上又添以健而行的意利涉是遇難而亨君子貞是發明于野之意利字只是復說亨利涉之意象則所謂未有大同於物不正者不正則自不能大同

同人之初未有私主言其時無私蓋數十人來相與初見之時未有厚薄不但人之公者能然雖私之人初見人時何厚薄之分至於處之既久公者則但無厚薄私者則漸有厚薄不同矣以剛在下則其德无私也上无

係應又無邪人在彼來誘我也同人于門只是同人无私之象然此止說无私意未說到曠遠也

陽為大有五陽故為大有健明是德居尊是位時行是治治即德之發用處大有只是天下皆在照臨之中而乾健離明居尊應天以得元亨者則治天下之道與其效也

无交害匪咎是爻義艱則无咎是戒占初九本為五之大有在此則亦為當大有之人大有者也交害只是富

則易驕多有而害生凡事久則有失而害生事之初未
有失也故未涉害

大車是剛中之象載是應上之占有才德為上信任也
有大車而不以載則大車徒空耳未說到勝重上載字
重有物得用上不重勝重細詳自見有所往而如是兼
剛中得應上无咎則勝任而免責矣

內止是其心抑止而無發揚之意猶厭住其有不外見
也亨是行得去人不阻抑拂亂有終是那所有始雖晦

而不彰終自著聞不可掩非是亨又有終也亨是眼前
終是後面事內無驕心外無驕行在上能謙從六五來
不富從六字來鄰從五陽來不富不是在上能謙在上
能謙在不富之上一層惟其在上能謙所以能不富以
其鄰利用侵伐雖是所當伐者亦本於謙而得衆來惟
謙而得衆所以侵伐能勝不然雖有所當伐亦不能勝
是不但征伐也凡事皆利德字從不富之象來利用二
句則占也

和樂應上是豫之正義順以動是所以致豫之由也卦辭中以順動含和應蓋能順動則自然和應矣俱在利字上

盍合也簪聚也速也聚而合之義速也由字上已有潤澤的意蓋因有澤及人故人悅樂然又必盡誠以來天下之賢為之輔助斯可保此和樂於無窮也朋來一句順動之意但上之順動所以致和樂也此之順動所以保和樂也順動一也用有不同耳天下皆和樂故為大

有得

此重物來隨己上剛柔以柔為己而剛為物彼此以此
為己而彼為物言固有主賓也已能隨物二句不平因
己能隨物故物來隨己然何以見其能隨物處陰自能
感陽動自能獲應元亨推開去指所為無礙也大凡人
輔者多則事易行然有元咎之亨有有咎之亨如亂臣
十人之在周故凡制禮作樂刑罰討罪沛然施行無不
隨意宋朝王安石引用蔡章之徒充塞朝廷當時一時

所為誰敢阻滯然罪大惡極矣

隨有獲此文郭子儀可以當之貞字是得民之正自是盡臣職耳非如田常厚施於國暗邀人心者也然亦凶上之所甚忌莫過於大臣之得人心謂其附彼而離我也昔宋太宗於真宗之立不喜曰人心遽屬太子置朕何地父子之間猶然凶危可畏哉

良巽非蠱乃所以致成蠱也

陽剛字要玩是有用世之才德者也若止不事王侯而

不高尚其事猖狂於天下如竹林七賢之徒亦不足貴也

此卦之意蓋言當陽長之時固大通利正然恃其長盛一或不謹自此以往亨者不亨而正者不得遂矣唐之五王宋元祐諸賢似之八月是自子十一月至未六月也剛長中亦有負意剛非負而何體德中亦有元亨義其善如此自可大通

知何以為大君之宜蓋以一事自為之猶之可也大君

以一人之身總萬幾之衆是可不任人乎中庸曰舜之
所以為大智者以其不自用而取諸人也與此同

九五居上言有觀之位內順外巽言有觀之德夫有位
而無德則固無以觀天下有德而無位則亦不能以觀
天下此觀之意順巽就是中正致其潔清四句是不敢
輕易舉動凡有所為熟思審處也字是示天下之孚顒
若是為人所仰總是一箇觀字有孚顒若是君身可為
人仰非人已仰之也示者仰者皆中正也

觀我生進退如漆雕開吾斯之未能信則不仕是也此
謂可進可退之時若決不可進之時雖通亦不進矣此
時不是時世之時乃所遇之時如孔子當大亂之世可
以進則進是也

觀國之光主二四言用賓主占者言

生字本陽剛中正蔡氏曰六三觀我生進退能含象九
五乃占何也曰六三居下之上可進可退便有自審之
意九五陽剛中正以居尊位其下四陰仰而觀之君子

之象也原无觀之意曰觀我生者戒占者而已如是是字指爻中君子

上九處賓師之位人之所仰也謂之主賓者以我字直指自家其字自他人說我觀猶人云那上九自觀他所為故云主賓也就字意有如此分別以爻義觀皆是自觀也

亨字泛說不指折獄言既亨又利於折獄也正如謙之六五利用侵伐又無不利也噬嗑伏羲本意只是去其

阻塞則合文王以大通明之折獄是文王卦中又指出
一事而言後周公六爻皆以折獄言之非伏羲名卦即
以獄為主也非如訟卦本為訟也亨字斷不可用折獄
說是非未辯而有爭物之間也是非既明則合矣

得黃金黃字亦從五來厲是操心危已當還恐未當惟
恐其或差也作危殆者非是

賁亨通則通矣而所通者小何也有文可通無本故小
攸往亨亦在賁道發揮陽本能行而內又離明故亨陰

本不能行又艮止於外以得剛文故小利有攸往不能行於外也

敦本尚質從柔中來得賁之道從為賁之主來賁文也如何本實為得賁之道本實乃賁之主也東帛戔戔即形容那丘園之狀也敦本為質自其陰性吝嗇言東帛戔戔雖是得賁之道然却薄小蓋因其性之吝嗇做出本實薄小之事然是賁之主但分兩下耳戔戔又狀那東帛也此丘園之象正論語所謂先進於禮樂野人也

以宮人寵無不利利是有貴人以為之主故凡事順遂
或以其行已也恭其事上也敬其為已也順其為人也
忠此是講无咎非利字意

得輿剝廬是象占具其中得輿在五陰在下承一陽取
象剝在一陽在上五陰欲覆取象剝廬者小人本賴君
子以安也今衆小人把君子都剝落了到那禍亂既成
小人自家亦不能保是自剝其廬矣自古如漢唐宦官
把那君子都殺盡到了袁紹朱溫來時盡行誅族豈非

自剝其廬乎狄仁傑在武后時正似碩果

此復字全從剝來至坤則陽氣已萌特未成耳亦足以見天地消息之機聖人知幾之神也方剝之時陰方盛而尚隔純坤然復之陽已根於此矣正與剝之上九本義所謂剝未盡陽復生相表裏

不復本於六來終迷本於上來復終則為姤矣其能復乎災指天說如星辰晝見水旱不時之類在一人則如疾病之類肯指人說如盜賊弑奪之類在一人則如獄

訟之類此又義是以一人說行師非真用師是言其凶之大也十年不克征則又終凶矣

无妄九五遠人稍有不恭便欲近攻遠討非勿藥也必如周公之於殷民夏禹之於有苗然後為勿藥也或以上下相交言言其相信之深或有讒譖之至勿辨蓋相信之深讒譖之言必不入若辨之則反多事矣或以嫌疑小生不必辨則大非既相信又何足嫌疑有嫌疑又何以為无妄之至耶

健極則難畜畜極則當變而不畜故畜極而通一句總承上二句來譬以堤障水到那水滿時堤固不能障水亦自溢是所以畜之者與為所畜者皆極矣故通二陽同類豈相畜俱進重三三隨上而進良馬只指三說艱負與衛四字平說然艱負乃所以行與衛之道也輿是致用之具治平之法是也衛是自防之術如左右近幸指吾為非及奸人緣法作弊險小之人求吾之失而致譖皆思所以防之者如何輿乃治之法衛乃法之防須

有了如此本事方可居官如良馬之逐也利有攸往即良馬之逐也所以艱貞習閑者只是為三過剛進銳來非為九不可防也

觀頤二句不是正之實是考其正與不正也求字解作考字慎言語節飲食只是養德養身之急務觀頤口實所包者濶不止二者而已節飲食可取鄉黨夫子飲食之節

此是人初能自守而終遂改節者如漢之紀唐始以清

修著名後仕王莽及光武起而得罪矣爾指初九我指四朶頤亦指初謂初見四而朶頤也

大過不是剛過亦不是中強之弊本末之弱只是有非常之變而大異於常之時棟撓是當事變之時無非常之才事必敗如漢之竇武何進之去宦官子之之讓國趙括之為將皆是剛過只是去其過而就中是其才可以濟大過如周公伊尹霍光之處幼主湯武之征伐皆能濟事而成功蓋謂行權者言也

大抵此文言剛柔得中剛可濟過偏於柔則不可濟過
兩意也得中由文以陽居陰來至於柔以文以陽居陰
已中了又應之於陰則過於陰矣大抵當有變之時過
于柔過于剛俱不可只要得中隆是其才只可當大事
吉是事成了

水最是能陷而險者陽陷于陰如物沉于水險可知矣
人最是外焉若無事內藏禍心為險陷若外面有些機
緘發露猶可測度故內實外虛為陷險之義也


初六以陰柔居重險之下陰柔既非濟險之才又居重陰之下則其勢又難于自免其象則為習坎而入于坎窞矣自習坎而入于坎窞也以六三言之入于坎窞不言習坎例之可見窞者坎中之小穴乃險中之險可見是險中又險無可出之理矣凡言坎者猶有可濟之理入于坎窞終無可出之理矣

此只是附麗之麗无明義其象為火體陰用陽正是說附蓋火是陰體附是陽為用不說是火明何也下彖辭

無明之義也或曰麗字兼附與明陰麗于陽是附之義其象為火是明之義下象亦有重明字眼

缶是常用之物大耋之嗟是取象言當將衰之際愁悶不能自遣也不止為嗟耋且將死言人於盛極而衰之際不能自處則凶如霍氏既收兵權之後乃不違缶樂之理兄弟相對而泣所謂大耋之嗟也遂滅其族又常見當世之貴人一被淪棄不勝其憂多至亡身或不勝其戚戚之心寄情於神仙盃酒之間往往敗名破業皆

所謂凶也嗟夫士君子當其未遇之時固嘗困窮拂逆矣及其既陟華要而被罷遣是固吾偶得之常耳乃往往不能自安名為達人大觀者亦不能不動於中矣夫惟孟子貧賤不移難矣哉吾知免夫是矣



范洛集卷二十